

Forum Politico di SNBA a destaca e falta di vision y cambio entre candidatonan politico

Diamars anochi a tuma lugar e Forum Politico di San Nicolas Business Association, cu a conta cu participacion di tur partido cu ta registra pa participa den proximo eleccion dia 6 di december. Enfoke di e Forum aki tabata obviamente San Nicolas y su interesnan particular y specifico, y den e contexto aki a haci diferente pregunta na cada partido.

A pesar di algun 'glitch' tecnico, e evento a bay den un bon manera sin mucho interrupcion ni problema. Sinembargo, e formato di e Forum a laga comunidad insatisfecho. Entre otro, e preguntanan tabata un poco generico, pa loke cada partido a dji contesta segun nan plan di partido, cu ya ta disponible, den mayoria di caso, pa lesa den su totalidad. Tampoco tabata cuestiona of debati e contestanan, ni door di e moderadornan, ni door di e otro participantenan den e Forum. Esaki a haci cu e sesion



di Q&A no tabata mucho mas cu un mini-discurso di cada partido cada biaha, sin mucho interaccion.

Tambe tabatin critica cu e Forum tabata mas un medio pa presenta e interesnan di SNBA en bes di informa electorado di San Nicolas. Durante e Forum, SNBA a duna un presentacion tocante nan plannan pa desaroyo di San Nicolas.

Algo cu a resalta ta cu e partidonan no-tradicional, manera HTC, tabata miho prepara di loke hopi a spera y toch a presenta propuestanan interesantes. Un momento cu a genera hopi interes riba rednan social tabata momento cu candidato di partido HTC, Gilbert Webb, a insinua cu lider di ReD, Ricardo Croes tabata na soño. Esaki pasobra Croes a critica cu tur partido ta bin cu idea, pero no ta bisa di unda e placa pa implementacion lo bin. Webb a contesta cu el a bisa caba cu lo introduci un parke di diversion na San Nicolas, y esaki lo financia proyectonan. Sinembargo, e comentario di Croes toch tabata al caso pa publico, ya cu e pregunta di unda placa lo sali pa financia proyecto ta uno cu ta toca cada ciudadano.

Varios partido a enfoca riba e topico di "rebiba caya grandi"

di San Nicolas, pero mester cuestiona si esaki ta vale la pena. Principalmente considerando e hecho cu no a logra rebiba e caya grandi den Oranjestad ni maske a haci cantidad di esfuerzo y inversion. Tal bes ta ora pa pensa cu e era di un caya grandi ta pertenece den pasado, y enfoca riba solucionnan cu ta pas cu e comportamentonan di consumidornan actual.

Y riba e topico di desaroyo creativo, algo cu a genera hopi decepcion ta e falta di creatividad y vision di mayoria di partido, cu a hancra tur propuesta di desaroyo di San Nicolas riba turismo. Sea turismo medico, cultural, of tradicional – crucero, hotel, waf – e realidad ta cu Aruba mester desaroya un otro pilar economico en bes di keda depende riba turismo. E desaroyo di San Nicolas por ta un oportunidad tremendo pa

introduci desaroyo sostenible di otro pilar economico, pues tabata desapuntante pa mira mayoria di candidato keda enfoca riba turismo.

Y tocante sostenibilidad ainda tabata falta mas. Desaroyo no ta nifica construccion, y esey ta algo cu vooral e generacionnan nobo, pero sigur tur cu ta stima nos isla, ta tene central. Especialmente cu e cantidad di construccion cu nos ta mira tur rond cu ta lagando tiki espacio pa naturalesa y nos flora y fauna vulnerable. Cu mas propuesta pa construccion, expansion y turismo, ta surgi e pregunta unda e localnan – flora, fauna y humano – ta suppose di biba, y mas ainda prospera. Ta parece mas manera e idea di nos candidatonan politico ta mas un "gentrificacion" di San Nicolas na lugar di un desaroyo cu por trece prosperidad pa pueblo.

Finalmente, algo cu a keda falta ta e asuntonan mas relevante pa pueblo en general, cu tambe ta conta pa habitantenan di San Nicolas: salario minimo cu ta bao bestaans-minimum, un costo di bida impagable, escasez di vivienda, y falta di empleo bon paga, entre otro. Considerando esaki, e desaroyo di turismo na San Nicolas no ta parece un manera adecuado ni eficaz pa atende cu e preocupacionnan mas urgente di nos comunidad.



Hulanda preocupa pa influencia economico di China den parti Caribense di Reino

Recientemente, parlamentarionan di Tweede Kamer, Don Ceder (ChristenUnie), Mpanzu Bamenga (D66) y Raoul White (Groenlinks-PvdA) a entrega un mocion tocante influencia di China den e paisnan Caribense di Reino. Den un carta na Tweede Kamer riba e asunto, minister di Exterior a expresa preocupacion pa e influencia economico creciente di China na Aruba, Corsou y Sint Maarten.

Den un carta dirigi na presidente di Tweede Kamer, minister di Asunto Exterior, Caspar Veldkamp siman pasa, e minister a referi cu tabata respondiendo na e promesa di Secretario di Estado pa

Relacionnan di Reino, Zsolt Szabo di 23 di october ultimo, durante e debate plenario tocante aprobacion di presupuesto di Relacionnan di Reino (IV) y fondo BES (H) pa 2025, y pues ta contestando tocante e mocion entrega pa miembran Ceder, Bamenga y White.

Segun minister Veldkamp ta nota, e paisnan di Caribe den Reino ta autonomo den creacion di relacionnan internacional economico. E principianan di politica exterior ta establece e marco pa esaki. E vulnerabilidadnan den ambito di seguridad economico en relacion cu inversionnan stranhero tambe por tin consecuencia pa Reino en su totalidad. Den e sentido aki, e



influencia economico creciente di China den e region en general ta relevante.

Ministerio di Asunto Exterior ta sigui di manera general e actividadnan di China den e region y ta mantene un dialogo continuo cu e paisnan tocante esaki. E nota di politica di Reino, 'Hulanda-China: un ekilibrio nobo' ta fungi como marco pa esaki. E minister ta nota ademas cu Tweede Kamer lo ricibi pronto un carta riba e desaroyonan den politica pa cu China, den bista di un debate di e Comision tocante China dia 18 di december. Ta bay inclui e tema aki den e carta en cuestion, y mirando esaki, e minister ta desconsheha e mocion.